

Desaroyo na Eagle Beach ta cabando cu turtuga

ORANJESTAD – Autonan a pasa riba 6 turtuga baby y mata nan. Segun fundacion Turtugaruba, desaroyo riba y rond di Eagle Beach ta cabando cu e turtuganan aki; locual a pasa caba na Palm Beach unda e turtuganan no ta bay mas.

6 Driekiel chikito a sali di un neishi prome cu nan a cumpli e periodo di incubacion completamente. En bes di lama, nan a bay riba caminda di Eagle Beach y autonan a pasa y mata nan tur. E incidente a tuma lugá diamars madrugá. Pa motibo cu e turtuganan a sali trempa, nan no a cera e neishi ainda, e fundacion ta splica. Esaki nan ta haci 60 pa 70 día despues cu e webonan wordo poni.

“Den un ambiente sin desaroyo, nan ta hala for di e parti mas atras y scur di e beach

y bay na e parti mas cla, na unda e streaman ta refleha riba e lama y unda nan wak e horizonte cla y sin obstaculo. Pero na Eagle Beach tin hopi luz artificial, net na otro banda di e beach. Palo di luz banda di caminda, luznan di hotel. P’esey e turtuganan ta bay den direccion robes, si e luznan artificial no ta blokia.”

Situacion peligroso

Hasta cu esfuerso di e boluntarionan pa proteha e turtuganan, e fundacion ta bisa cu e desaroyo ta cabando cu e turtuganan. “Mas cu binti aña caba nos ta hopi preocupa. E diferente gobiernonan di e ultimo binti aña a desaroya mas y mas edificio canto di lama pa gana placa lihe. Te cu awor aki ainda nan ta duna permiso pa construi hotelnan nobo, condominio, bar, etc.”

“Ya caba tur turtuga di lama a desaparece di Palm Beach pa via

di e desaroyonan. Nan no ta bin mas pa eybanda. Asina e beach ta pa recreacion di hende so”, Turtugaruba ta bisa.

“Y awor mes cos lo bay sosode na Eagle Beach. E cuida constante di e boluntarionan di Turtugaruba no por preveni cu e turtuganan ta den un situacion hopi peligroso. Construcion di otro hotel banda di Eagle Beach (no un hotel low rise pero uno di mas piso) ta pendiente. Y banda di Costa Linda Resort e gobierno a traha un bar riba e beach, net na unda e Driekielnan tabata traha nan neishi cu mas frecuencia e añanan anterior.”

E bar a wordo construi pa e turistanan di crucero por bay na e beach ey y haci uzo di baño y por cumpra algo di bebe, asina gobierno a splica e fundacion. “Intencion tabata cu esaki lo ta habri sola-



mente durante e oranan di dia. Esaki a wordo priminti na Turtugaruba. Pero e bar a haya permiso di DIP pa keda habri cada anochi te cu 12or, causando cu te laat autonan ta pasa y e luznan ta ilumina e beach constantemente. Pa colmo e matanan di druif cu a duna proteccion contra e luznan di e caminda a wordo minimalisa. “Alcohol y desorden a tuma e lugá di nos naturalesa.”

No ta cumpli cu ley

E neishi di turtuga ta proteha pa ley na Aruba, pero hopi ley local no ta wordo cumpli y internacionalmente Aruba no ta cumpli cu su debernan tampoco. “Naturaleza lo bay perdi na Eagle Beach y e programa di SDG (metanan di sostenibilidad di Nacionnan Uni) no ta parce den alcance”, asina e fundacion Turtugaruba ta enfatisa.